



Taulogologo

TUSI MO LE PULE'AGA FA'A-AKIEPIKOPŌ A UELIGITONE (PASTORAL LETTER),

MATI 2019



15 Fepuari 2019

Mo le mamalu o tagata lotu uma, O nai aso e le'i mamao atu nei, sa ou tu'uina atu ai i Komiti Fa'atonu o a outou palisi atoa ai ma le vasega o ta'ita'i o palisi, se pepa o lo'o aofia ai se fa'atonuga. E seāseā ona ou fa'atonuina palisi i se mea e tatau ona fai, ma o lona uiga, e atagia ai le ogaoga ma le tāua o le mea ua ou mana'omia outou e fa'atino.

Ole va o le tausaga e 2013 ma le 2017, sa fa'agasolo mai ai le tu'ufa'atasia o palisi a le tatou Pule'aga Fa'a-Akiepikopo, lea na fa'aitiitia ai le aofa'i o palisi mai le 47 sa iai muamua i le 22 i le taimi nei. O lona uiga o lea mea, ua iai nei palisi ua ta'ilua pe sili atu le aofa'i o latou falesā, ua sili atu nai lo le tulaga mana'omia mo tapua'iga ma le tausaga o le soifua fa'atuatua o tagata. E iai nisi vaega sa maitauina ai le fa'atuai ona tu'ufa'atasia o lanu ma gagana 'ese'ese o tagata lotu.

E le gata i lea, ae o lo'o fa'aauau pea ona feagai le Pule'aga Fa'a-Akiepikopō ma isi fa'afitauli le ma'aalofia, ua atili ai ona mamafa le avega ma lamatia ai le sologa lelei o le lumana'i:

O le mataupu uiga i le fa'amalosia o fale mai a'afiaga o mafui'e, ua mafua ai ona si'ita'i i se tulaga maualuga ua tatou lē gafatia, le tau o inisua mo falesā ma isi fale ua lē pasia le fua fa'atulafonoina mo le saogalemu i taimi o mafui'e (NBS rating).

O le fa'aitiitia o le aofa'i ma le to'agaogao o le aufaigaluega Pelepitelo, lea ua maitauina le televave pea i tausaga ta'itasi, o lona uiga, o le tele o tatou palisi, ua na o le ta'ito'atasi faife'au ma o le to'atele lava o latou ua matutua, ae mana'omia ona auaua i falesā uma o lea palisi. O le avanoa atoa ai ma le gafatia e faife'au o le fa'atinoina o le galuega, o nisi ia o mafua'aga ogaoga e fa'avae ai le tatau ona faia vave o tatou fa'ai'uga mo le lumana'i, e aunoa ma le fa'atuai.

O le Sinoti ole 2017 a le Puleaga Fa'a-Akiepikopō, na pasia ai ma ioeina ni fuafuaga fou e ave iai le

fa'amuamua, e tatau ona fa'atino. O ia mea, e lē tatau ona manatu e fa'apea, ua nā o ni "mea fa'aopoopo" i mea masani o loo tatou faia. Ae o mea ia, e mana'omia tatou uma e silasila toto'a iai ma ni mata fou, fa'atasi ma le Tama Paia ia Pope Falanisisi, i le toe lauliliuina lea, fuafua ma fa'atulaga lelei, pe fa'apefea ona avea i tatou ma "Tagata o le Atua", i le si'osi'omaga o nei onapo.

Ua vala'auina tatou e fai ma "apostolo fa'a-misionare", lea e mafua ai se saunoaga a Pope Falanisisi, na ia ta'ua ai, o le manatu e fa'apea "o le faiga lava lea sa masani ona tatou faia ai se mea", e le gata ina lē lelei mo le Ekalesia, ae ua lē o toe iai se aogā.

O le ata moni lenei o lea mea ua tatou iai nei:

Ua tele na'uā o tatou falesa ma fale e nonofo ai faife'au fa'atua i le aofa'i o tagata lotu, ma le aofa'i atoa ma le matutua o faife'au.

O nisi falesa e tele tupe e mana'omia ai mo le fa'amalosia ina ia pasia fa'atulafono mo le saogalemu i taimi o mafui'e atoa ma lo latou tausaga masani.

O le lu'itau mai ia Pope Falanisisi ma le tatou Sinoti, ina ia tatou silasila toto'a ma fa'alautele atu a tatou galuega ma auunaga uma ia aofia ai tagata lima vaivai ma fa'aletonu lo latou tamaoiga aemaise ē ua lamatia lo latou ola fa'atuatua ona o fa'afitauli o lenei lalolagi.

Ina ia lelei lo tatou tali atu i lu'itau o tatou feagai ile taimi nei atoa ai ma le lumana'i, e mana'omia lo tatou galulue fa'atasi mo le manuia o palisi uma, ma lagolago le tasi i le isi, ile fa'atinoina o ni suiga. O le mea mautinoa e le faigofie lea tulaga mo tatou uma.

E iai nisi o outou o le a manatu, o lenei mea o se lu'itau o le a lamatia ai le tulaga o le soifuaga o tatou iai nei, ae peitai, ou te mana'o ina ia outou silasila ma avea lenei fuafuaga, o se avanoa lelei lea, e afio mai ai le Agaga Paia e galue i o tatou loto ma agaga i le fausia o se lumana'i e fa'amuamua ai galuega o le fa'atuatua i se faiga ma se tulaga tatou te gafatia.

O lona uiga la, o lea ua ou poloa'iina ai nei palisi ta'itasi uma, ina ia fa'atino loa ona iloilo ma lau liliu le tulaga o iai a outou falesā ma fale o faife'au, e aofia ai palisi uma e na o le ta'itasi falesa. O le taunuuga o ia iloilo, e tatau ona fa'ao'o uma mai ia te a'u, fa'atasi ai ma ni fuafuaga atoa ma ni fautuaga mautū, a'o lei tuana'i le aso 30 o Oketopa 2019.

AFIGA KATINALE JOHN DEW

O le a tatau ona aofia ma māioio mai i le Lipoti Aloa'ia o nei iloiloga fa'a-palisi, le aofa'i o falesā e mana'omia e le palisi mo le tautuaina o ona tagata lotu (e fua foi i le avanoa o faife'au atoa ma ta'itai fa'apalisi), ma le tulaga o le falesa po'o falesa mana'omia. **Mo le tele o palisi, pe afai e le o palisi uma e sili atu i le tasi o latou falesā**, o lona uiga, o le a mana'omia le fa'aitiitia o le aofa'i o falesā o lea palisi. E aofia foi i lenei iloiloga, ia le tulaga o fale e fa'amautu iai faife'au i totonu o palisi ta'itasi.

E a'afia i lenei fa'amoemoe, le tu'ufa'atasia, aoina ma le fa'auigaina o fa'amatalaga aogā uma, atoa ma le faia o ni feiloa'iga ma ni fa'atalanoaga o tagata lotu o palisi ta'itasi. O le fa'amoemoe autū lava, ina ia maua mai ai i nei vaega uma, ni fautuaga e tusa o ni fuafuaga lelei ma talafeagai. O le nā ua i a'ao o Komiti Fa'atonu (*pastoral team*), o palisi uma ae fa'apea le vasega o ta'ita'i fa'a-palisi (*pastoral leaders*), ia fa'amatalaga au'ili'ili, e tusa o lenei fa'amoemoe, ma o le a feiloa'i i latou i se taimi lata mai, e silasila i auala ma ni faiga talafeagai e fa'atinoina ai.

E mana'omia le sauni ma tapenapena mo le lauliliui-

na o la outou tofa ma le fa'autautaga o'o e tusa o lenei fa'amoemoe taua.

O le agaga ma le autū sa fa'amamafaina i le taimi na tu'ufa'atasia ai o tatou palisi o le "Lumana'i e Fa'atumulia i Fa'amoemoega" (*Future Full of Hope*). E fa'ato'ā amata ona tino mai se lumana'i-e-fa'atumulia i fa'amoemoega, pe a o tatou fa'amaoni ma loto tetele e fetufa'ai ma tali le mau fesili e uiga i o tatou fale.

O la outou auauna i Le Alii
Ioane A Katali Dew

Akiepikopō o Ueligitone

(fa'aliliuina e Lauano A. Ilaou)

O LE VAITAU O LE FAGAFULU

2

Na ta'ita'iina atu tagata Isaraelu i le toafa ma le folafolaga o le nu'u e tafe ai le susu ma le meli. Na savali i lenā folafolaga mo le fasefulu tausaga, e ui le fa'aletonu o le si'osi'omaga o lene toafa, na ta'ita'ia i latou ma fagafaina i mea'ai mai le lagi ma vai mai le papa. Na foa'i atu e le Atua mea'ai ma fa'amalosi'au iā i latou, ma le ilo o mea o le a i ai ua sili i lo mea ua i ai. Sa ia fa'amalosia i latou i lona alofa na foa'i fua ma vavega na tutupu ia i latou.

Ina ua taunu'u, na fa'ataunu'uina folafolaga, sa le fiafia ma tu'u fesili. Sa su'esu'e leaga ma masalosalo. Ua vave ona galo ina ua fa'aletonu, sa le'i afaina ai ae na fa'asa'oloto. Ua le manatuaina ina ua tu i tulaga leaga, o lona lima na fagafaina i latou. Sa latou tu'ua Lē na maua uma mai ai le fesoasoani ae ua fulitua i vavega na tutupu ia i latou. Ae fa'afetaia e lē gata ai i'inei. I lona alofa ma le agalelei, na fa'amuta ai e le Atua le tala i'inei. Sa auina mai lona Alo e lavea'ia i tatou mai ia i tatou lava ma faia mea ua tatou lē mafaia.

Ina ua mae'a lona papatisoga, *ona aveina a'e lea o Iesu i le vao e le Agaga, ina ia fa'aosoosoina e le tiapolo. Ua fa'alāina o ia i po e fagafulu ma ao e fagafulu, mulimuli ane ua fia taumafa ai lea o ia* (Mataio 4: 1–2). I lona itu tagata ua faia ina ia fia 'ai ma vaivai. I lona mamana, ua faia ina ia malosi, tula'i ma le usita'i atoatoa pe a fa'aosoosoina e le fili. E aunoa ma le fa'anaunau i se mea sa tatau ona i ai pe faitio fo'i i mea e tatau o i ai, na fa'amaulaloina e Iesu o ia lava ma usita'i. Na finau mo le mea moni i folafolaga na faia ma manavaina le ola i upu tusia. *Ona tu'ua ai lea o ia e le tiapolo, fa'auta fo'i, ua o mai agelu ma 'au'auna mai iā te ia* (Mataio 4: 11).

O le vaitau o le Fagafulu o se vala'aulia i le toafa, o se taimi e savali ai ma le loto malie, e tomanatu ai, fa'aleleia ma

fa'afou. O le Fagafulu o le taimi tatou te fa'anaunau i ai. Fasefulu aso e fa'amaopo mai ai ma le loto atoa le fia 'ai, fa'ailoa ai o tatou vaivaiga, talia lona alofa ma ola i le kalasia ua ofoina mai. Tatou te fa'afetaia mo le vala'aulia ma ulufale atu ma le fiafia, mafanafana mo vavega o lo'o fa'atalitali mai.

I Sakalameta ua Tatou Feiloa'i Atu ai iā Keriso le Fa'aola

Ua a'oa'o mai e le Katesimo o fa'ailoga fa'asakalameta, o ni fa'ailoga ua o fa'atasi ma tatalo po'o ni fa'amanuiaga, e lē avatua ai aloa'ia le kalasia a le Agaga Pa'ia e pei ona faia e sakalameta, ae ua sauniuni ai i tatou e talia le kalasia.

O le efuefu ua fa'apa'iaina ma tufatufa i le aso Lulu o le Lefulefu ua fa'ailoa ai le salamō ma fa'ae'e ai i le tai i tatou mo le faigamalaga o le Fagafulu. Ma o se fa'ailoga malosi tele na lefulefu!

O le Aso Lulu o le Lefulefu ua toe fa'afō'ia maia le anoanoa'i o atali'i ma afafine a le Ekalesia, pe amiotonu pe fa'atautala. O le mea moni, o se aso ina ua ave'a ai le fa'atautala ma molimau tāua mo latou ua manatu e amiotonu. Ona e le afaina pe fa'afia ona le 'au a'i, pe tau mamao ma le Ekalesia o tatou, po'o latou fo'i, e toe fuafuaina o latou lava, le toe fo'i mai ma le fa'anaunau e tau ave'a lenei fa'ailoga o le salamō ma molimau e loloto toe misitelio. O lenei totino e ao ona tu'u atu i ai la tatou fa'aaloalo ma le maofa, ma le fa'amoemoe, e vala'auina maia a tatou tatalo.

Ua a'oa'o ina mai fo'i e le Katesimo o fa'ailoga fa'asakalameta ua lafoa'ia i tatou i sakalameta. O le matagofie la ona ua amatalia le Fagafulu i fa'ailoga fa'asakalameta, ma ta'ita'i atu ai i tatou aga'i i sakalameta o le Eseta.

O LE VAITAU O LE FAGAFULU

‘Aua ne’i pei i tatou o le uso matua na musu e fiafia ma le uso fa’atautala, ae ia tatou maitauina o tatou fo’i fa’atautala, ma ‘au atu ma o tatou uso ma tuafafine i le faigamalaga o le Fagafulu, tu’u fa’atasia ile papatisoga, toe vala’auina fa’atasi e le Misitelio loloto ua fa’aosofiaina e na lefulefu. Ia ta’ita’i uma fa’atasi i tatou aga’i atu i lenā Eseta!

“O ‘oe o le efuefu ma e te toe fo’i i le efuefu.” O upu ia e tautala ai le faife’au ma fai le fa’ailoga i o tatou muaulu i le aso Lulu o le Lefulefu o le amataga o le vaitausaga o le Fagafulu. O tulaga masani e fa’apa’ia le lefulefu i le taimi o le Misasa i le vaisā ma fa’ailoga ai muaulu o le ‘aufa’atuatua. O lenei tū ma āga, o se fa’ailoga lea o lo tatou toe fo’i i le Ali’i, o togisala, anapogi ma le fa’amanatu mai pea o tatou na’o ni tagata. O le fa’aogaina o le efuefu e fa’amatala mai ai o tatou vaivaiga ma fa’aletonu, e le gata la o se sauniga ae ua tau’ave e le Ekalesia le fa’aogaina o le lefulefu o se fa’ailoga o tatou togisala ma le vala’au i e uma ua papatisoia i lenei vaitau o le Fagafulu.

I aso anamua i le aso Lulu o le lefulefu, sa masani ona savali ai le Tupusā e leai ni se’evae e aga’i atu i Sagata Sapina i Roma, e amatalia ai le anapogi pa’ia e fa’asagatau atu ai i agaga leaga ma puipuia mai ai i fa’aososoga. O le fa’aogaina o le lefulefu i lea aso e lē o se fa’ailoga o le oti ae o le folafolaga o le ola.

O afiafi o aso Lulu uma o le Fagafulu o le ‘a maua ai avanoa mo le Sakalameta o le Fa’aleleiga (Kofesio), ma e avanoa ai fo’i Faife’au o Palisi ta’itasi mo lea fa’amoemoe. E tatala falesa mai le itula 7.30pm se’i o’oo i le 8.30pm i le afiafi.

O FAFINE O LE EVAGELIA — FA’AAUUAU MAI LOMIGA TALU AI

E Fa ni Va’aiga Uiga ‘Ese o Fafine

E ‘ese’ese ‘auala ua tu’uina mai ai e tusi Evagelia ta’itasi fafine ma a latou matafaioi. Tu’u i se isi fa’aupuga, ona o le mata’itū i fafine, o le ‘ese’esega o manatu a tusi evagelia ta’itasi ua manino lelei mai. O Maleko, le evagelia muamua na tusia (c. A.D. 65 – 70), ua afiafi fa’atasi atu i tua ina ia foliga mai o lo’o iloa atu lo latou taūa ua natia. Sa feiloa’i atu Iesu i nai fafine i le ala i Ierusalemā – e pei o le afafine o Iariu (Maleko 5: 21 – 24, 35 – 43), le fafine ma’i puna toto (5: 25 – 34), ma le fafine Suria Foinie sa ‘ai’oi atu iā Iesu e fa’amalōlō lana tama (7: 24 – 30). Atonu o fafine e lē taūa iā Mareko. Ae ui i lea, i le taufai’ui’u o lana evagelia, i le fa’amatalaina o le saisaia o Iesu, o le mea lenei sa maitauina e Mareko e uiga i so’o: “Ona tu’ua ai lea o ia e i latou uma, ua sosola” (14: 50). I le isi lava mataupu e soso’o ai, i le fa’akoluseina, ua ia tusia e fa’apea: “Sa i ai fo’i fafine o matamata mamao mai”... latou “o e na mulimuli atu iā te ia a o i Kalilaia o ia, atoa ai ma isi fafine e to’atele o e na o ae fa’atasi ma ia i Ierusalemā” (15: 40, 41). O lenei fa’amatalaga, i se fa’aupuga pu’upu’u lava, o se fa’auigaina lea o le fa’aso’oina mo Mareko.

O Mataio, e mulimuli iā Mareko i le tele o ‘auala, e atagia mai ai e mataitū i si vaega o le a’afiafa o le evagelia i tagata i lo le taūa o fafine. Mo se fa’ata’ita’iga, o le tala i le tamaitiiti a Mataio e autū iā Iosefo i lo Maria, e pei o Luka. Ae o le fa’aofiofi maia o tala i fafine i le fa’amatalaga a le evagelia a Mataio e ofoofogia ma e taūa tele. Mo se fa’ata’ita’iga, e to’alima fafine ua iloa i le gafā a Mataio (Tamara, Raava, Ruta, Patesepa, ma Maria).... Ua na o Mataio o lo’o ta’ua le fa’alavelave a le avā a Pilato e fa’apea e lē tatau ona a’afia Pilato i le fasiotia o Iesu, o se “tagata amiotonu” (27: 19), ua fa’ailoa mai ai o le leo fa’aperofeta a fafine e ao ona amana’iaina ma taliaina. Ma iā Mataio o le tinā o Iakopo ma Ioane e taūa, e le gata i lana talosaga mo ni faiga fa’apitoa mo lana fanau ia ae sa i ai i le fa’akoluseina o Iesu.

E manatu nisi o Luka i nisi o taimi e ilitata i matafaioi tau’ave a fafine, ae na faitioina fo’i i le fa’aopopo o ni tusi-

tusiga ua atagia mai ai le tau fa’atauva’aina o fafine. Mo se fa’ata’ita’iga, le fafine na ū’uina vae o Iesu ua lauiloa “o le fafine agasala” (7: 37), ma o fafine a Luka i nisi o taimi e fa’atonutonu e Iesu. E aunoa ma le o’o atu i lenā finauga, e mafai ona tatou fa’apea a’e e tele atu tala ua a’afia ai fafine iā Luka i lo isi Tusi Evagelia. Fa’ata’ita’iga, e tolu fafine ua lauiloa ai le fa’atulagaga o le tala i le pepe (Maria, Elisapeta ma Ana iā Luka 1 – 2). O le vitua mativa i le Malumalu na vivi’i e Iesu ona o le ofoina o lona olaga atoa mo le ‘au’aunaga i le Atua (21: 2 – 3), pe a fa’atusatusa atu i ta’ita’i “o e fa’auma fale o fafine ua oti a latou tane” ma ua faia lea mo so latou lava fa’aeaea ma le ta’uleleia (20: 45 – 47). Ua na o Luka fo’i e i ai le tala i le afafine o Aperā’amo, o le na fa’amaloloina e Iesu mai lona ma’i, “uona tu sa’o lea o ia, ua vivi’i atu i le Atua” (13: 13). Ma ua na o Luka fo’i e fa’amatalaina le vitua o Naina ma lana tama lea na toe fa’aolaina mai e Iesu ma fa’afo’i atu iā te ia. Ua na o Luka fo’i lea ua aumaia se ata o Iesu i le fale ma Maria ma Mareta (10: 38 – 42), ua na o Luka fo’i o lo’o ta’uina mai iā i tatou i le aga’i atu i le ala, o fafine taūa ma fafine masani sa fa’atasi atu ma Iesu ma le to’asefulu ma le lua a o faimalaga atu i Ierusalemā ma a’oa’o atu iā i latou (8: 2 – 3).

O le evagelia a Ioane o lo’o fa’alaua’itelea maia matafaioi a fafine i le amataga o le galuega tala’i a Iesu. O le fafine Samaria mo le fa’ata’ita’iga, sa auai ma Iesu i se fa’atalanoaga i mataupu silisili ma na ave ma se tasi o ulua’i misionare o le tala lelei. Na fa’apea fo’i ona fa’atauanau Iesu e lona tinā ina ia faia le ulua’i vavega i Kana, se tasi o “fa’ailoga” e fa’ailoa ai lona tagata ma lona mamalu (2: 1 – 11). O le evagelia fo’i a Ioane ua avatua se tulaga taūa o le fa’auō ma talanoaga i fafine a o fa’aalia e Iesu o ia i ana galuega ma tala’iga. O se tasi o ‘auala ua fa’aoga e Ioane e faufau ai ana tala o le faia lea o fa’atusatusaga ma le ‘ese’esega. Mo fafine, o nei ‘ese’esega ua mata’utia. Na sili atu le faiga o le fafine Samaria i lo Nikotemu; le fafine na ū’uina Iesu iā Iuta; Maria Matalena iā Peteru lava ia. I le galuega lava ia o le tala lelei, o nei ‘ese’esega o lona uiga o fafine e le fa’aitiiti le taūa i lo

ali’i, ua vala’uina e fa’alogo ma tala’i le upu, ia avea ma molimau iā Iesu ma le tala lelei.

Le Uiga mo Tatou

I le sili atu ma le limasefulu tausaga talu ai, sa tu’u fa’atasia ai e le Vatikano II lana pule ma nisi tusitusiga a Pope na muamua atu e fa’amalosi’au i Katoliko ina ia tuliloaina a’oa’oga i le Tusi Pa’ia ma ia fa’aogā avanoa uma ua maua aemaise ni avanoa fa’asikolasipi ina ia a’oa’o ai ma maua ai se malamala’aga o le a fua tele mai i le Tusi Pa’ia. O a’oa’oga fai fa’afa’apotopogoga i lo a’oa’oga ta’ito’atasi e masani o a’oa’oga fa’atusi pa’ia ia fa’a – Katoliko. O le fai fa’atasi ua mafai ai ona tatou fa’amalosi’au ma lu’itau ai le tasi i le isi e va’ai ai i fafine ua tatou faitau ai i le Tusi Pa’ia i o tatou fo’i tala ma mulimulita’i iā latou fa’ata’ita’iga ma le loto tele ma le fa’amaoni.

O evagelia ua lē na o Iesu lava ia ae ua fa’apea ona fa’amatala mai ai fo’i ma fafine ma ali’i sa talitonu o Iesu o le Mesia na folafolaina mai e le Atua, ma o ia na suia o latou olaga ina ia salalau le folafolaga o le fe’au a Iesu o le fa’aolataga i tulu’iga o le lalolagi. O gaioiga na amata e Iesu o Nasareta ma lana vaega toaititi na tuputupua’e ma avea o se a’asauaga ma le fefe o ana ave fe’au. O tagata o auga tupulaga ‘ese’ese ua faitau i evagelia ma mau ai o a latou fo’i tala o tala o le liliuga. E ala mai i evagelia ua vala’uina i tatou e tu’ua o tatou matata’u ma masalosologa, o tatou fefe ma fa’alavelave, ae ia avea ma misionare o le fe’au o le alofa o le Atua mo le lalolagi e pei ona fa’aalia mai iā Iesu.

E matagofie lava nisi o vi’iga tetele a Iesu ua fa’asino lea i fafine sa talitonu ae le’i va’ai ma na fa’atuatua e aunoa ma ni molimau. I le fafine i Kana, na fai atu i ai Iesu, “Funa e, ua tele lou fa’atuatua! E pei o lou mana’o, ia fa’apea lava ona faia ia te oe” (Mataio 15: 28), ma o lana tama teine na fa’amaloloina i lenā lava taimi. Na fai atu Iesu i le fafine ma’i na lē popoi aga’i atu ma pa’i atu iā Iesu, “Lo’u afafine, o lou fa’atuatua ua e malolo ai; ina alu ia oe ma le manuia, ma ia e malolo i lou ma’i tigā” (Mareko 5: 34). Ua silasila atu Iesu ma le alofa i lona fo’i tinā ma fa’amanuia iā te ia i le tu’uina atu i le va’aiga a se tasi ua alofa i ai (Ioane 19: 27). O tala fa’apenei o mea ia a evagelia, ma ua i ai mo tatou. Ua telē lava se ‘ese’esega ona ua si’itia ai tulaga o fafine sa natia ma le maualalo i sosaiete. O fafine fa’apenei ua vala’uina i tatou ina ia tatou o ‘ese mai le fa’apaologa o tatou fefe ma le pala’ai, ma nofoia o tatou nofoaga tatau fa’atasi ma so’o a Iesu. Ua vala’au evagelia i ali’i ina ia fa’aalologia fafine, mulimulita’i i fa’ata’ita’iga a Iesu. Ua vala’au evagelia i fafine ina ia su’esu’e o latou tagata Kerisiano ma toe fa’afo’i mai tulaga na tu’uina mai e fafine loto tetele ma le fa’atuatua i le olaga o Iesu. Ua fa’ailoa mai e tusi Evagelia e mana’omia le ‘au ai fa’atasi o ali’i uma ma fafine i le malo o le Atua.

Ua manino lelei mai na fa’aalia ma poloa’ia e Iesu le

fai mea tonu mo latou ua le amana’iaina, le a’afiaga o latou ua te’ea e le sosaiete, ma le agalofa fa’apitoa mo latou e leai se malosiga po’o ni aiā tatau mo latou lava. O Iesu e tu malosi mo le ‘au matitiva, o e mama’i, tagata agasala, ma latou e i tulu’iga o le sosaiete. I evagelia, o latou ia o lo’o ta’ua mai i tala e uiga i fafine ma tagata o nu’u ‘ese, ma o Iesu e va’ava’ai pea i tagata fa’apea ma tali atu i o latou mana’oga. E ao ona tatou masalomia o le mea o lo’o fa’amamafa mai i taimi uma e evagelia e fa’o se vaega o le fa’aaliga e ao ona tatou iloaina mai tala o evagelia. Ona tatou te lē maua ni fa’amamafa a Iesu mai le aganu’u ma tulaga fa’atāuina o ona taimi, atonu o ni vaega tatau ia o le malō fou o lo’o ia folafolaina e pei ona fanau mai ai mo i tatou le ‘au fa’atuatua.

I leni tusitusiga o le a fa’asolosolo malie atu, o le a tatou va’ava’ai ai i ni fa’ata’ita’iga e ono o fafine o le evagelia ma taumafai ai e fa’ailoa lesona lelei mai o latou olaga e pei ona fa’amatala e evagelia. O le tala ia Ana ma Elisapeta, e le gata e fa’afiafia ma fa’aosofia ai i tatou ae e lu’i ai fo’i i tatou, e pei o fatu lelei i le fa’ata’oto o le taliaina o le upu ma le “se loto fa’amaoni ma lelei ona fua mai ai lea ma le onosa’i” (Luka: 8: 15). O fafine na mulimuli iā Iesu mai Kalilaia, e a’afia ai le tinā o Iakopo ma Ioane, ma na onosa’i ma le fa’amaoni e o’o lava i le koluse ma lona falelauasiga, o fa’ata’ita’iga ia mo tatou. O la latou matamata ma le fa’atalitali na tapena ai i latou mo le toetū ma na mafai ai e i latou ona folafola atu i isi. O le feagai ai o Iesu ma le Fafine Samaria ma Maria o Petania na avea ai i la’ua ma so’o ma misionare moni; ua lu’itauina ai i tatou e faia ni mea se tele e fa’ailoa atu ai le telē o le agalelei iā i latou e fa’alogo i ai.

Atonu o le a tu’ufesili le ‘au faitau i le tatou tusitusiga fa’asolo leni e i ai ni fafine tāua tele e le o ta’ua mai la tatou tala fa’asolo – Maria, le tinā o Iesu, ma Maria Matalena. Ua fa’amuta lava le filifiliga i fafine e fa’a’autū i ai la tatou va’ava’ai. Ua tele nisi o tusitusiga tetele i nei fafine e to’alua ua igoa uma ia Maria ma e sa’ili lava e le tagata ia nisi o su’esu’ega ia i la’ua ia.

SAGATO IOSEFO — *Le Tane a Maria*



Ua maualuga le fa'aeaea a le Tusi Pa'ia mo Iosefo; o ia o se tagata "amio tonu." O lenēi fa'amatalaga, o lona uiga e sili atu i lo le na o le fa'amaoni i le totogiina o aitalafu. Ina ua fai mai le Tusi Pa'ia a "fa'avala" e le Atua se isi, o lona uiga o le Atua o le Tasi e pa'ia ma amiotonu ua suia le tagata, o lenā tagata o le a suia ma fa'asoa ai i le mamalu ma pa'iataga o le Atua, ma ua talafeagai ai i le Atua ona alofa i ai. O se isi fa'aupuga e le o ta'alo le Atua, ma faia e pei o tatou e alolofa ae leai.

I le fa'aupuga fa'apea o Iosefo e amiotonu o lo'o fa'apea mai le Tusi Pa'ia o ia sa tatala atu lona tagata i so'o se mea na mana'o i ai le Atua mai iā ia. Na avea ma tagata pa'ia ina ua ia tu'uina atu atoa lona tagata i le Atua.

O le isi vaega atoa ua faigofie lava ona malamalamaina e aunoa ma nisi fa'amatalaga. Manatu i le ituaiga o alofa sa fa'atosiga mai ai Maria, ma le loloto o le alofa sa la'ua fa'asoaina i le vaitau o le la fa'aipoipoiga.

E le'i i ai lava se masalosologa ma le pa'iaga o Iosefo e le'i loto e fa'amasiasi iā Maria ina ua maua le tala ua tō o ia. Sa lē manatu e fa'ate'a lemū pe fa'amā o ia i luma o tagata (Mataio 1: 19).

O le tagata amiotonu e olioli, ma e usita'i atoatoa i le Atua – i le fa'aipoipoitu iā Maria, i le fa'aigoaina o Iesu, i le leoleoina o i la'ua i le malaga aga'i atu i Aikupito, i

le toe aumaia o i la'ua i Nasareta, i le fetine'ia'i i le tele o tausaga o le filemū i le fa'atuatua ma le loto tele.

'IA VI'IA OE'

(LAUDATO SI' - Pope Falanisisi)



V. O SE LALOLAGI TU'UFA'ATASIA

89. O mea na faia i lenēi lalolagi e lē umia saoloto: "auā o o āu mea lava mea uma, le Alii e, o oe lē agaalofo i agaga o tagata" (*Poto 11:27*). O le pine fa'avae lea o lo tatou talitonuga, o se vaega o le fogāelele, ua vala'auina ma tagataola e le Tamā e to'atasi, o i tatou uma e feso'otai i so'otaga lē va'aia ma tu'ufa'atasia ai i se ituaiga o aiga fa'alelalolagi, o se feso'otaiga matagofie e tumu ai i tatou i se paiāga, le alofa mutimutivale ma le agamalū fa'aaloalo. O i ou te toe fa'apea ai "Ua fusia fa'atasi i tatou e le Atua i le lalolagi o lo'o si'omia ai i tatou, ua mafai ai ona tatou lagonaina le fa'atafunaga o le palapala pei se ma'i fa'aletino, ma le soloa o ituaiga meaola e pei o se fouvalega matuiā."

90. O le mea lea e lē tu'ua ai meaola uma i se laina e tasi, pe ave'esea ai le tagataola mai lona tulaga tāua ma le tele o ona

tiute o lo'o aofia ai. Na te lē faia foi se faiga fa'aataua e fa'alelagi ai le fogāelele ma taofia ai i tatou mai le galueā'ina ma puipuia lona ma'aleale. O manatu fa'apea o le a i'u ina fa'aosofia ai ni fa'afitauli fou lea e ave'esea ai i tatou mai le mea moni lea e lu'itau ai le tagata. I nisi o taimi tatou te va'ava'ai ai i le papago i mea ma le fa'afiti i so'o se mea e fa'asilia le tagata soifua; ua sili atu le ma'elegā ua fa'aalia i le puipuiga o isi ituaiga o meaola nai lo le puipuia o le tama'ali'iaga lea e fa'asoa e tagata uma i le tulaga tutusa. E moni, e tatau ona tatou popole i isi meaola e lē gafataulimaina. Ae e tatau ona patino le tatou ita i le maoo'e o le lē tutusa i totonu o i tatou lava, lea tatou te fa'aauau ai ona afisi i nisi ua manatu e sili atu ona aogā nai lo isi. Ua pō le tatou va'ai e iloa ai nisi ua lopala i puapuaga ma le pagatia i le mativa, e aunoa ma se auala e alo i ai, ae o isi ua sili ona nenefu manatu i se mea e fai i a latou mea totino, ua fa'aalialia ai le manatu fa'amaualuga ma ua tu'ua ai e i latou ni fa'atafunaga o otaota e tele, afai

o le tulaga lea e tupu i so'o se mea, lona uiga o le a fa'aumatiaina le paneta. I galuega fa'atino, e fa'aauau pea ona matou lu'itau i le manatu e sili atu i latou nai lo isi tagata, e peisea'i na latou fananau mai ma ni aiā tatau e sili atu.

91. O se lagona loloto i le feso'otaiga ma le tele o le natura e lē mafai ona moni pe afai tatou te lē loto agamalū, agaalofo ma popole mo o tatou uso-a-tagata. E manino fete'ena'iga o vevesi i fefa'atauaiga e lamatia ai ituaiga meaola, a'o tumau pea le noa o se ese'esega ma le fefa'atauaiga o tagata, lē popole i e matitiva, po'o le taumafai e fa'aumatia le isi tagataola ua i ai le manatu ua lē mana'oina. O lenēi fetu'una'iga, o le uiga tonu lea o la tatou tauiviga mo le lelei o le siosiomaga. E le o se mea na tupu fua, i le pese na vivi'i ai Sagato Falanisisi i le Atua mo ana meaola, na ia fa'apea ai: "Ia vi'ia oe, lo'u Alii, e ala mai ia i latou o e fa'amagalo i

'IA VI'IA OE' (LAUDATO SI` - Pope Falanisisi)

lou alofa". E feso'ota'i mea uma. O le popolega i le si'osi'omaga e tatau ona tu'ufa'atasia i se alofa fa'amaoni mo o tatou uso-a-tagata ma se tautinoga maumaututū e fo'ia fa'afitauli o le lalolagi.

92. E lē gata i lea, pe afai e tatala moni o tatou loto i feso'otaiga lautele, o le lagona fa'auso e taeaofa'i ai mea uma lava e aunoa ma se mea e tasi e tu'ua. E mulimuli mai i lo tatou fevaevaea'i po'o lo tatou sauā i uso-a-meola o lenei lalolagi, a lē vave pe mulimuli ane foi, ua a'afia ai togafitiga ua fa'alauiloa e tu'uina atu i isi tagata soifua. O tatou, e na o le tasi lava le loto, ma i lea lava tigā e tasi e ta'ita'ia atu i tatou i le sauāina o se manu, o le a le umi se taimi na te fa'aalia ai o ia lava o lo tatou so'otaga ma isi tagata. So'o se amioga sauā lava e faia i so'o se meaola e "fete'ena'i ma le tama'ali'iaga o le tagata." E faigata ona tatou taliaina i tatou lava i le alofa atoatoa pe afai tatou te lē amanaiaina so'o se itu o le mea moni: "O le filemu, le fa'amasinoga tonu ma le fa'asaina o le foafoaga, o autū ia e tolu e sili ona atoatoa feso'otaiga, e lē mafai ona tu'uese'eseina pe togafitia

ta'itasi e aunoa ma le toe goto atu ina fa'aitiitia." O mea uma lava e feso'otai, ma o i tatou o tagata soifua ua tu'ufa'atasia pei o uso ma tuafafine i se malagasā matagofie, e lalagaina fa'atasi i le alofa o le Atua mo ana meaola uma ma e fa'apena foi ona tu'ufa'atasia ai i tatou i le alofa mutimutivale ma le uso o la, le tuafafine o masina, le uso o vaitafe ma le tina o ele'ele.

----- E faia pea ----- Fa'alliaina Falefou Sio -----

UA TAUNU'U PATELE ANDREW MA PATELE TULI I UEIGITONE



Ua ite nei le malama nai Sauā, ae malama i ulugalulu le fetū a Tapuitema. Ae ua tini pa'ō le uto e pei o le faiva o Tapelega. Ua tali mai le Agaga Pa'ia i fa'a – tofalaiga ma lavasiga, ma feutanaiaga a le Ituaga o Misionare o le Fa'atuatua mai Roma ma lana Afioga Katinale John Dew o le Akiepikopo a le Pule'aga Fa'aakiepikopo Katoliko i Ueligitone e ala i ni ali'i Pelepitelo e galulue i le tatou Pule'aga nei i Ueligitone.

Na fa'aulufale ma fa'apa'ia aloa'ia e Katenali le afioga ia Patele Andrew Atonio Pauga o lē ua avea ma Tamā o le Palisi i Porirua, fa'apea le afioga iā Patele Tuli Paulo o lē e fesoasoani e tausoa le la galuega fa'apea le afioga iā Patele Ramesh o lo'o talitali le taunu'u mai i se taimi o i luma.

O le afioga iā Patele Andrew o le lupe fa'alele auā Tuliaupupu ma Tuliaupupu o le fofoga o Lealataua. Fa'apea le Usoali'i ma le Alo o Malietoa, le matua ma le Teiali'i ma alo o Tuliaupupu. A o se taulaga auā Maluletaua ma Tuisamau. O le afioga iā Patele Tuli o le lupe fa'alele auā le afio o Leilua ma le to'alima o ona Alo. Salalatoa ma Alo o le Malietoa ma upu ia te oe Safotulafai. I le mae'a o le Misasa i Porirua na vala'aulia e lana afioga Katinale John Dew Patele Andrew ma Patele Tuli fa'apea nisi o faife'au o le latou ituaiga sa malaga mai Aukelani, mo le Misasa e amata ai galuega fai a le Kapelanisia Samoa. I le mae'a o le Misasa na alo le Kapelanisia i le agatonu o le taeo auā le afio o le Katinale ma le 'au ositaulaga. Na saunia e Ekalesia mai Wainuiomata ma Petone le 'ava o le feiloa'iga a o le fetalaiga ia Fata Launiuvao mai Titahi Bay na fetalai i le lauga usu auā se afioga taumomoli a le kapelanisia. Na mae'a le 'ava o le feiloa'iga ona tauluga lea o le aso i le taumafataga na saunia e le Kapelanisia. E momoli atu ai le fa'afetai i aulotu ta'itasi a le Kapelanisia mo tapenaga o lea aso. Malo le tautua, malo le galulue auā le Atua ma lona finagalo.

Tulimanu o Aoga Aso Sa

Faatalofoa atu i le paia ma le mamalu o le tatou Kapelenisia poo le Matagaluega Samoa Katoliko i Ueligitone. Malo le soifua maua ma le lagi e mamā ile Ituaigasa, faapea le soifua ma le lagi e lelei ile tatou Matagaluega.

Avea lenei avanoa matou te faailo atu i lo outou paia ma mamalu - ua a'e se tofā i le afioga o le ta'ita'i o le Kapelenisia afioga Salā Mika, Susuga o le faatamā o Aoga Aso Sa, Kalolo Perez ma fai-aoga Aso Sa o le Kapelenisia e faia lea o se itulau mo Aoga Aso Sa ile Taulogologo, e faailo atu ai ni fuafuaga, gaoioiga ma faasilasilaga o lenei auunaga i totonu o le tatou Kapelenisia/Matagaluega. E faailo ai fo'i mataupu (activities) o loo faia i totonu o aoga ta'itasi. O le masina o Aperila e amata ai ona faagasolo lenei fuafuaga mai i aoga ta'itasi. O le faasologa mo Aoga Aso Sa o loo i lalo.

E talitonu o le tasi lenei auunaga (Aoga Aso Sa) i totonu o le tatou Kapelenisia ua sili ona tā'ua tele mo alo ma fanau o Ekalesia ta'itasi.

Fetalai Iesu: **“O a'u o le Ala, Upu Moni ma le Ola”**. O matua o ulua'i faiaoga lea mo tamaiti i lona faatuatua e na te faasino le tamaitiiti ia Iesu le Ala, Moni ma le Ola. E fesiligia fo'i tatou e le Atua, pe sa faatino o tatou tiute o le ta'ita'i ma faasino a tatou fanau ia te Ia. O le ala fo'i lea o le taumafai atu e faamaopoopo Aoga Aso Sa a le tatou Matagaluega/Kapelenisia ina ia vaavaalua ma fesoasoani mo outou matua i la outou matāfaioi ile a'oa'oina o alo ma fanau i lo latou faatuatua ile Atua aemaise ina ia ta'ita'i i latou ia Iesu o Ia o le Ala, Upu Moni ma le Ola.

O le mea lea e talosagaina ai ma le agaga faaaloalo le tatou Kapelenisia ina ia tatou galulue faatasi ile faamaopoopoina o a tatou Aoga Aso Sa i totonu o a tatou aulotu ma le tatou Kapelenisia auā le atina'eina o le ola faatuatua o le fanau.

[Ua mae'a le suiga tofi ile faaiuga o le tausaga ua tuana'i ma ua aveai nei i matou nei o auunaga o le Kapelenisia e faafoeina Aoga Aso Sa o lenei tausaga:](#)

7

Ta'ita'i: Salā U Siila Muavae
Failautusi: Lesina Nanai
Teutupe: Malia Taito

Faasilasilaga

O lea ua tasi le tatou polokalame e faaoga e aoga uma a le Kapelenisia, o le polokalame o le Tausaga C. O lena ua emeli atu le polokalame i sui o aoga. A faapea e le'i maua atu la outou polokalame ona logo ane lea le afioga ia Salā Mika pe logo mai fo'i le matou ofisa faamolemole. A fia maua fo'i se fesoasoani e tusa ma le polokalame ona logo ane lea le afioga ia Salā Mika poo le Susuga ia Kalolo Perez.

Ma lo'u faaaloalo lava.
Faafetai.

Ofisa Aoga Aso Sa (Kapelenisia)

Ua ofoina mai e Luka ni 'oa fa'aleagaga ua na o lana Evagelia e maua ai ma ua fa'atonutonu ai o tatou olaga Kerisiano, tatalo ma manatu mai le amataga. Mai i augā tupulaga ua mavae, o le fa'ata'oto o le Samaria Agalelei (Luka 10: 29 – 37) ma le ali'i mau'oa ma Lasalo (Luka 16: 19 – 31) ua lu'itau ai le 'au fa'atu-atua e fesoasoani i tagata matitiva ma le 'au atuatuvaale ma le 'au mafatia. O tatalo Kerisiano ua tauavea tatalo matagofie lea ua amatalia mai ai tala a Luka e uiga iā Iesu: o le *Pese* mai le Taupou o Maria (Luka 1: 46 – 55), le *Perofetaga* a Sakaria (Luka 1: 68 – 79), ma le *Pese* a Simeona (Luka 2: 29 – 32). O le tele o le 'au tusi ata e toe fo'i pea lava i tua i le va'aiga o le *Fa'alauloaga o le Fanau mai o Iesu* (Luka 1: 26 – 38) ma le *Fanau mai o Iesu* (Luka 2: 1 – 20).

O isi 'oa e sau mai fa'amatalaga a Luka o le auina atu e Iesu o so'o e fitusefulu ma le lua i se misiona e folafola le malo o le Atua (Luka 10: 1 – 20). O le a le mea e fa'apitoa ai lenei tala? O lo'o fa'aailoa mulimuli mai i se vaega ua sili atu lona ta'ua: o le fa'apa'iaina ma le amataga o le galuega tala'i a le to'asefululua (Luka 9: 1 – 10). O le to'asefulu lua nei o ali'i na tu'u fa'atasia o se fa'apopotoga uiga 'ese, sa latou mulimuli iā Iesu i lalo nei ma na avea ma molimai aloa'ia i lona toetū mai le oti ma o latou o tamā na fa'avaeina le Ekalesia. Ua avea i latou ma ta'ita'i o fa'apopotoga Kerisiano ina ua afio mai le Agaga Pa'ia i le ulua'i Penetekoso. Na fa'amalosia ma fa'amanaina e le Agaga Pa'ia, o le to'asefulu ma lua lenei na latou fa'aaga-fuaina ma fa'afotu ai le fa'asalalaua o le Ekalesia.

O aposetolo e sefululua o lo'o va'aia o ni tagata maoa'e i le amataga o Kerisiano. E le'i faigofie mo tatou nei Kerisiano na mulimuli mai ona fa'aailoa po'o ai tatou pe a fa'atusa atu iā i latou. E foliga o ni tagata maoa'e tele i lo lenei olaga e pei o tioata felanulanua'i o lo'o va'ia i falesa o lo'o tusia ai o latou ata po'o ni fa'atusa fo'i i totonu o falesa e pei o fa'atusa tetele o lo'o i le malumalu tele i Roma. E le pei o aposetolo e to'asefululua, o le vaega to'atele fitusefulu ma le lua na auina atu e Iesu i le taimi o lana galuega e pei e fai sina latalata iā i tatou. Sa o atu ta'ito'alua. Tatou te le mailoa o latou igoa po'o a ni mea na tupu iā i latou mulimuli mai le toetū o Iesu ma le sasa'a mai o le Agaga Pa'ia. Pe o ni ali'i uma i latou? Atonu e leai. I nai mataupu i luma atu sa ta'ua ai e Luka ni fafine e pei o Maria Matalena, Ioana ma Susana (Luka 8: 1 – 3). O ni so'o na latalata iā Iesu ma na latou feoa'i fa'atasi ma fai lana tala'iga. O le fitusefulu ma le lua na auina atu e tala'i, masalo sa a'afia ai ma ni so'o fafine, atonu o nisi o ni ulugali'i fa'aipoipo. Tatou te le mautinoa lenei vaega, ae e lē mafai ona tatou vavae'eseina lea manatu. O le a'oa'oga ua tatou maua mai le Evagelia a Luka na avatu e Iesu i se motu o tagata e to'atele na mulimuli iā te ia, fitusefulu ma le lua, ni tofiga fa'amisionare. O le a le mea na tupu iā i latou mulimuli ane? Pe na iai nisi o latou po'o o latou uma mai le 120 na potopoto ma tatalo i Ierusema fa'atasi ma Maria le tinā o Iesu, Peteru ma le 'au aposetolo na totoe ae le'i afio mai le Agaga Pa'ia i le

fa'apopotoga atoa (Galuega 1" 12 – 15). E masalomia o nisi o le to'a fitusefulu ma le lua na avea ma ta'ita'i o le Ekalesia Kerisiano i le mae'a o le Penetekoso, ae tatou te le iloaina nisi fa'amatalaga.

Pau le mea ua tatou iloa mai iā Luka na avatu e Iesu se galuega fa'amisionare i se fa'apopotoga e sili atu le toa'tele i lo le sefululua. E faigofie lava ona tatou fa'aailoa fa'alemafaua i lenā potopotoga tele, tulaga ma le fa'asologa o so'o sa ia tu'uina atu i ai le satuatolu o matafaioi: *ia aumai le filemū po'o fea lava e malaga i ai, fa'amalolo tagata mama'i, ma tala'i atu le malō o le Atua.*

O le fa'apa'iaga na avatu i so'o e fitusefulu ma le lua o totino ia o Kerisiano uma na papatisoina. O tatou uma o tagata o le filemū, ali'i ma tama'ita'i e aumaia i isi le filemū o Keriso po'o fea lava tatou te o i ai. O tatou fo'i ua vala'auina e 'au'auna atu i isi i le tausia lelei o e mama'i, fafaga latou ua fia 'a'ai, asiasi i e ua ta'ito'atasi, ma fa'amalosi'au iā i latou ua leai se fa'amoemoe. O tatou fo'i ua vala'auina e folafola le malo o le Atua, ma ta'u i tagata le matagofie o le olaga fou na aumai e Iesu i le lalolagi nei.

O le tala o le auina atu o le to'afitusefulu ma lua o lo'o fa'amanatu mai pea mea e ao ona faia e pei o ni misionare a Kersiso. E mafai ona tatou liliu lenei tala ma tatalo o le su'esu'e o tatou lava. Po ou aumaia le filemū o Keriso i so'o se mea ou te alu i ai? Pe ou te tausii atu i e mama'i ma latou e i ai le mana'omia? Pe ou te fa'asalalau atu le upu e uiga i le fa'amanuiga na ala mai le tagata ma le afio ai o Iesu Keriso?

Pe sili atu so tatou iloa?

O se mea matuiā na tupu, na suia ai le va'aiga i le fa'ataoto i le Farasaio ma le ao lafoga (Luka 18: 9–14). Ia Novema 1989 i le atunu'u o El Salvador, o Patele Ignazio Ellacuria ma faife'au e to'alima o le ituaiga o Iesu, fa'atasi ai ma le latou kuka ma lana tama teine na toso fa'amalosia i fafo e le 'au fitafita mai a latou moega ma fasiotia. I le tele o atunu'u i le laolagi e masani ona va'aia se ma'a fa'amanatu e foliga i se koluse o lo'o lisi ai igoa e valu o latou ia.

I nai vaiaso ae le'i fasiotia i latou, i se fonotaga a le nu'u, o faife'au nei e to'aono sa tomanatunatu fa'atasi i le fa'ata'oto lenei. Sa latou tu'ufesili iā i latou lava: Pe moni e le sili atu i tatou i lo Farasaio? Ua manatu ua tatou iloaina le fa'afitauli i lenei atunu'u. I le fa'aosofiaina e le telosia fa'asaoloto, ua tatou galulue nei ina ia fa'afoti'ia nei fa'afitauli. Ae ua tatou faia uma nei mea i le agaga o le "ua sili atu lo tatou iloa i lo latou e faitio i le telosia fa'asa'oloto?" Ae i le loloto lava ia o tatou o ni tagata e tatou manatu fa'asausili ma le fia amio tonu? Ua tatou femitai o tatou lava e sa'o iā tatou manatu ma le faiga e sili atu i lo tagata ua faitio mai? Sa fa'amatala e se faife'au le fasiotia o latou o le ituaiga o Iesu i El Salvador. O le 'auala na fesiligia ai i latou lava o se vaega o le maualuga ma le pa'iaga o latou. Afai na latou iloaina le lapata'iga o le 'au fa'atasi ma le 'au Farasaio, e tatau fo'i ia i tatou. O nei

O A'OA'OGA A LUKA MA LE ALOFA – *fa'aaauu mai lomiga talu ai*

suli o le ituaiga o Iesu sa lagonaina le fa'asoosoga na mafua ai ona manatu fa'apea: 'e le pei tatou o isi tagata. Va'ai i le lelei, e o'o lava i le toa, mea o lo'o tatou faia.' Sa manana'o e 'au atu i le ao lafoga ma fai atu ma le loto maualalo: 'Le Atua e, alofa mai ia te a'u, o le tagata agasala.'

O lo'o soifua o Ia

Ua aumai e Luka se matagofie i le tala o so'o e to'alua o lo'o savavali ma Iesu, ma i nai itula ona maitauina lea o ia i le tofitofiga o le falaoa (Luka 24: 13 – 35). O le manaia ia o le fa'atulagaina o le tala. E aunoa ma le 'auiliiliina o fa'amatalaga, o le fatu o le tala e sau mai le taimi na ta'u atu ai e so'o ni tala na fa'amatala e ni fafine e uiga ia Iesu: 'o lo'o soifua o ia.'

E fiafia Luka e fa'aoga le upu 'soifua' e uiga ia Iesu ma mea na tutupu ia te ia. I luma atu ina ua asiasi atu fafine i le tu'ugamau, sa feiloa'i atu i ni agelu e to'alua sa tautala mai i se leo e tasi ma fesili mai: "Se a le mea tou sa'ili ai le ua soifua i e ua oti? E le o i'inei o ia a ua toetu". E le'i ave'esea e Luka le gagana o le toetu, le gagana o le toe fa'atuina mai o Iesu mai le oti. Ae ua fa'aopopo le gagana o le ola. O Iesu o lo'o soifua!

O lo'o mana'o Luka e fa'amanatu mai ia i tatou mea na tutupu mulimuli mai i le toetu. Toetu mai le oti, ua olioli i le matagofie, o le ola fou. Ua soifua mai o ia mo ia lava. Ua mana'o e fa'asoa ma i tatou lona olaga mamalu ua suia. O ia e foa'ia le ola. I le tatalo o le Fa'atuatua ua tatou vala'au

ai i le Agaga Pa'ia 'Le Ali'i e foa'ia le Ola.' Ae o Iesu lava ia o lena: o lo tatou Ali'i o le foa'i mai le ola.

I le tala ia Iesu ma so'o e to'alua i le ala i Emāu, o le 'auga atoa o le tala e sau mai le lipoti a so'o o upu a agelu: o lo'o soifua o ia.' O la fatu atoa lena o le mataupu. O Iesu o lo'o soifua ma le mamalu, ma e mana'o e tosina atu i tatou i lona matagofie, o le ola fou. Na ona tatou tatalo: Iesu e, ua e soifua mai ma le matagofie. Tu'uina mai ia i matou ta'ito'atasi se fa'asoa anoanoa'i i lou ola toetu fou.

O SAKALAMETA UA TATOU FEILOA'I ATU AI IA KERISO LE FA'AOLA

9

Ua a'oa'o mai e le Katesimo o fa'aailoga fa'asakalameta, o ni fa'aailoga ua o fa'atasi ma tatalo po'o ni fa'amanuiaga, e le avatua ai aloa'ia le kalasia a le Agaga Pa'ia e pei ona faia e sakalameta, ae ua sauniuni ai i tatou e talia le kalasia.

O le efuefu ua fa'apa'iaina ma tufatufa i le aso Lulu o le Lefulefu ua fa'aailoga ai le salamō ma fa'ae'e ai i le tai i tatou mo le faigamalaga o le Fagafulu. Ma o se fa'aailoga malosi tele na lefulefu!

O le Aso Lulu o le Lefulefu ua toe fa'afo'ia maia le anoanoa'i o atali'i ma afafine a le Ekalesia, pe amiotonu pe fa'atautala. O le mea moni, o se aso ina ua ave'a ai le fa'atautala ma molimau tūa mo latou ua manatu e amiotonu. Ona e le afaina pe fa'afia ona le 'au a'i, pe tau mamao ma le Ekalesia, o tatou, po'o latou fo'i, e toe fuafuaina o latou lava, le toe fo'i mai ma le fa'anaunau e tau ave'a lenei fa'aailoga o le salamō ma molimau e loloto toe misitelio. O lenei totino e ao ona tu'u atu i ai la tatou fa'aaloalo ma le maofa, ma le fa'amoemoe, e vala'auina maia a tatou tatalo.

Ua a'oa'oina mai fo'i e le Katesimo o fa'aailoga fa'asakalameta ua lafoa'ia i tatou i sakalameta. O le matagofie la ona ua amatalia le Fagafulu i fa'aailoga fa'asakalameta, ma ta'ita'i atu ai i tatou aga'i i sakalameta o le Eseta.

'Aua ne'i pei i tatou o le uso matua na musu e fiafia ma le uso fa'atautala, ae ia tatou maitauina o tatou fo'i fa'atautala, ma 'au atu ma o tatou uso ma tuafafine i le faigamalaga o le Fagafulu, tu'u fa'atasa ile papatisoga, toe vala'auina fa'atasi e le Misitelio loloto ua fa'aosofiaina e na lefulefu. Ia ta'ita'i uma fa'atasi i tatou aga'i atu i lena Eseta!

"O 'oe o le efuefu ma e te toe fo'i i le efuefu." O upu ia e

tautala ai le faife'au ma fai le fa'aailoga i o tatou muaulu i le aso Lulu o le Lefulefu o le amataga o le vaitausaga o le Fagafulu. O tulaga masani e fa'apa'ia le lefulefu i le taimi o le Misasa i le vaisā ma fa'aailoga ai muaulu o le 'aufa'atuatua. O lenei tū ma āga, o se fa'aailoga lea o lo tatou toe fo'i i le Ali'i, o togisala, anapogi ma le fa'amanatu mai pea o tatou na'o ni tagata. O le fa'aogaina o le efuefu e fa'amatala mai ai o tatou vaivaiga ma fa'aletonu, e le gata la o se sauniga ae ua tau'ave e le Ekalesia le fa'aogaina o le lefulefu o se fa'aailoga o tatou togisala ma le vala'au i e uma ua papatisoina i lenei vaitau o le Fagafulu.

I aso anamua i le aso Lulu o le lefulefu, sa masani ona savali ai le Tupusā e leai ni se'evae e aga'i atu i Sagata Sapina i Roma, e amatalia ai le anapogi pa'ia e fa'asagatau atu ai i agaga leaga ma puipua mai ai i fa'aososoga. O le fa'aogaina o le lefulefu i lea aso e le o se fa'aailoga o le oti ae o le folafolaga o le ola.

O afiafi o aso Lulu uma o le Fagafulu o le 'a maua ai avanoa mo le Sakalameta o le Fa'aleleiga (Kofesio), ma e avanoa ai fo'i Faife'au o Palisi ta'itasi mo lea fa'amoemoe.

E tatala falesa mai le itula 7.30pm se'i o'oo i le 8.30pm i le afiafi.

SAGOLEGOLE

O LE TALA IA MATA'ULUFOTU

O ona po ia ua leva sa i ai le ulugaali'i e igoa ia Fine ma Sau. Ona fanau mai lea la la tama, o le pusi. Ua la ma i le tama, ona tuu lea i le ava.

Toe fanau le fafine, o le tama. Ua fiafia tele le loto o le ulugaali'i. Vala'au loa lea o le pusi, "Po o le a le mea ua oulua fiafia ai?" Tali atu le ulugali'i, "Ua ma fiafia i si a ma tama ua maua." Fai atu loa le pusi, "Aumai le tama, so'u 'aina." Ona ave lea o le tama ma le pusi.

Toe fanau fo'i lea o le isi tama, ua 'ai fo'i e le pusi. Ua fa'anoanoa le loto o Fine ma Sau. Ua toe to fo'i le fafine, ona fa'apea atu lea o le tamaloga, "Funu e, sau se'i ta sosola." Ona la sosola ai lea i gauta o Tufutafoe i le mea e igoa ia Lalolama. Ona fanau ai lea o le fafine o le tama, ua fa'aigoa ia Mata'ulufotu.

Ua o'o i le tasi aso, ona alu ai lea o le tamaloga e vele lana ma'umaga, ae fa'amuli le fafine ma le tama. Ua alu loa le ali'i, ona fasi oti lea o le tama e le fafine, ua 'ai lona tino, ae tu'u le ulu i lalo o le 'ulu. Ua fo'i mai Fine i lana galuega, ona fesili atu lea po o fea o i ai le tama, ae tali mai Sau na te le iloaina.

Ua o'o i le tasi aso, ona alu lea o le ali'i e toli 'ulu. Ua a'e le ali'i i le 'ulu, ona fa'alogo ifo lea i le leo ua tautala mai. Ua va'ai ifo, o lo'o ta'atia mai le ulu o lona atali'i. Ona fa'apea ifo lea o Fine, o le a fasi oti lona to'alua. Ua fai atu le ulu, "Aua le fasia lo'u tina. Ia e lalaga se ato e fafao ai a'u. Se'i tatou sosola ia ne'i meane ua maua tatou e le sau'ai."

Ona latou sosola ai lea, ae fafa le ato e le fafine. Ua o'o i Sataua ua po; ua tutumu fale i le au malaga. Ona latou o ai lea i le fale o Lealuga, ua ulufale atu i tua, aua ua ita mai le au malaga. Ua fafa pea le ulu o Mataulufotu i le tua o lona

tina. Ona fai lea o le talisuaga a le malaga, a e le avane se mea ma Fine ma Sau.

Ona momoe lea o tagata sa i le fale. Ua o'o i le vivini o moa, ona fai atu lea o le ulu i lona tina, "Se'i tatou sosola ia, o le a ao." Ona toe alu ai lea o le malaga, a ua oti uma tagata sa i le fale, aua na ave e le ulu o latou agaga.

Ua taunu'u le malaga i Fiti, ona afe lea i le alafaga o Tuifiti. Ua talileleia le malaga e le Tuifiti e ui ina se'i maliu lona afafine. Ona fa'apea atu lea o le ulu i ona matua o le a toe fa'aola le tama'ita'i. Ona nonofo ai lea ona matua i tafatafa o le teine, a ua alu le ulu o Mata'ulufotu i le lagi tuaiva i le tama'ita'i o Fulu'ulaalematoto. O le tama'ita'i lea o le sau'aitagata. Ua alu atu Mata'ulufotu, na o le tamaitiiti o lo'o i ai i le fale. Ua tepa a'e i luga le ulu, ua tautau ifo ni ato laiti se taele i le 'au'au o le fale. Fesili atu loa le ulu, "Po o le a le mea i totonu o le ato fou le tautau ifo mai?" Tali mai le tamaitiiti, "O le agaga o le afafine o Tuifiti na aumai e lo'u tina." Tago loa i ai Mata'ulufotu, ua ave i lalo. Ona toe ola lea o le afafine o le Tuifiti.

Ua tumu le loto o le Tuifiti i le fiafia, ona fa'apea atu lea ia Fine ma Sau, "E leai se mea lelei e avatu ma oulua, ua na o le i'a 'oso lenei (o le anae) a lo'u afafine o Sina."

Ua toe alu le malaga, ua taunu'u mai i Amoa. E i ai ona maua teleina ai le i'a a Sina i Amoa e o'o mai i aso nei.

EKALESIA SAGATA ANA NEWTOWN



ASO 3 MATI ASO SA VALU TAIMI MASANI:

Faitauga muamua :Sirako 27: 5 – 8.

Matua: Aua e te vivi'i atu i se tagata a o le'i tautala mai o ia.

Salamo: 92: 1 – 2 (tali), 12 – 13 (tali), 14 – 15 (tali). Tali: E lelei ona vivi'i atu i le Ali'i.

Faitauga lona lua: 1 Korinito 15: 54 – 58. Matua: Ua foa'iina mai le manumalo ia te i tatou e ala mai ia Iesu Keriso.

Aleluia, Aleluia...O au afioga o le agaga ia, o le ola fo'i ia; o ia te oe upu o le ola e fa'avavau...Aleluia.

Evagelia: Luka 6: 39 – 45. Matua: O le tele o mea i le loto e tautala mai ai le tagata.

Tofitofiga o le Upu:

O faitauga o le Evagelia ua a'afia ai ni vaega se Fa. (1) – Ua lapata'i mai Iesu i faia'oga ina ia 'aua le ta'ita'ia tamaiti a'oga i tua atu o lo latou malamalama'aga. O se lapata'iga saotualua lea mo tatou. I o tatou a'oa'oga e tatau ona sa'ili na o faia'oga aupito sili le poto ona na o latou e i ai le malamalama e mafai ona ta'ita'ia i tatou aga'i i luma; ia tatou a'oa'oga e ao ona manatuaina e le mafai ona tatou a'oa'oina ni mataupu tatou te le malamalama i ai.

(2). Fuaiupu 41 i le 42 o se fa'ata'ita'iga o le tausua a Iesu. Atonu sa faia ma le 'ata ina ua ia tusia i lona mafaufau se ata o se ali'i o lo'o taumafai e ave'ese mai se utupoto mai le mata o se isi tagata. Sa ia a'oa'oa mai e leai so tatou aiā e faitio vaganā ua leai ni o tatou sesē. O lona uiga e leai lava so tatou aiā e faitio ai, ona e tele atu le leaga i le to'atele o tatou e lelei ma le tele o le lelei i le to'atele o le leaga o tatou ua avea o se fa'ama'i i le taumafai e su'esu'e pona. (3). 43 & 44 ua fa'amantu mai ia i tatou o le tele o tagata e le mafai ona fa'amasinoina i nisi lava o 'auala vaganā o latou amioga sa fai atu i se faia'oga, 'E le mafai ona lagonaina mea ua e fai mai ai i le fa'alogo atu po'o ai 'oe.' O le a'oa'oina ma le tala'i o mea uma nei o le 'moni e ala mai i lou tagata. O upu lelei o le a le mafai ona suia amioga lelei. Pau le ala e fa'aali ai le Kerisiano o le fa'aali lea i o tatou olaga e maua mai ai ni ali'i ma ni tam'ita'i lelei. (4) – I le fuaiupu leni ua ofoina mai e Iesu se fa'amanatu o upu o tatou laugutu oni fuafuaga mulimuli nei o o tatou loto. E le mafai ona tatou tautatala i le Atua i o tatou gutu vaganā o lo'o i ai le Agaga o le Atua i o tatou loto. E leai se mea e iloa lelei ai le tulga o tatou loto vaganā ua tautala i upu ae le mafaufau lelei i ai. O upu e tali ai se fesili fa'afuase'i e masani ona iloa ai le vaega o lo'o ta'atia ai le loto. E masani o a tatou upu e fa'alataina i tatou.

Metitasio Aso Sa 3 Mati 2019

Talepe le Fola

I so'o se fa'aletonu, 'aleu, po'o se measesē a se tagata, o le taumafai lea e pupuni le sala. O se fa'autautaga e mitamita ai- ua le mana'o e talia lona sesē i vaega taitasi - ae nanā i lalo o le tele po'o le itiiti foi o fa'amatalaga sesē, e masani ona saili ni auala po'o ni mafua'aga e tu'uā'ia ai isi tagata. O le tulaga lea na faia e Atamu ma Eva ina ua uma ona la agasala, o le uiga foi lea o so'o se tagata na te faia se measesē. O le mea tonu lea o lo'o nofo ai se a'afiaga matautia mo le agaga o le tagata, ona e le mafai ona tatou fa'asa'oa o tatou sesē pe afai tatou te le naunau e fa'ailoa. E manaomia le lototele e talepeina ai ia faufauga poto, le fafauga o le alofa femoumoua'i o le tagata; e tatau ona fa'ailoa atu o tatou vaivaiga ma tilotilo sa'o i foliga, e pei ona i ai, e aunoa ma le tu'uā'ia o se tasi ae o i tatou lava. "A tatou faia se measesē," pei o le tala a Sagata Terisa o Iesu le Tamaititi, "e le tatau ona tu'ua'ia i lo tatou le lelei atoatoa... O fa'apogai e le avea ai se tasi ma tagata vaivai, ae latou te fa'ailoa atu ai lea tagata."

O le ufiufi o o tatou sesē atonu e fa'amalieina ai o tatou mitamitaga, ae o le mea moni, o le fa'atauasoina lea o le tagata lava ia ma le mafai ai ona iloa le mea moni. O le mea lea, ua le gata ina le aga'i i luma o tatou agaga leaga, ae ua fa'asalaina foi e sa'ililili i le pogisa e aunoa ma se avanoa e alo ai. O le isi itu, afai tatou te fa'amaoni i le iloa lelei o o tatou sesē, ua uma ona tatou ūia le la'asaga muamua e faasa'oina ai.

ASO 310 MATI ASO SA MUAMUA O LE FAGAFULU:

Faitauga muamua: Teterenome 26: 4 – 10.

Matua: Ua ta'utino e le nu'u filifilia lo latou fa'atuatua.

Salamo: 91: 1 – 2 (tali), 10 – 11 (tali), 12 – 13 (tali), 14 – 15 (tali). Tali: Le Ali'i e, ia e lavea'ina a'u i le puapugā.

Faitauga lona lua: Roma 10: 8 – 13. Matua: O le ta'utinoga o e fa'atuatua iā Keriso.

Fuaiupu mo le Evagelia

E lē na o mea'ai e ola ai le tagata, a o afioga uma e tulei mai i le fofoga o le Atua.

Evagelia: Luka 4: 1 – 13. Matua: Ua ta'ita'iina Iesu e le Agaga i le mea tu'ufua; ua fa'aosoosoina.

Tofitofiga o le Upu:

O le malosi o le fa'amamafaina mai o le papatisoga o se 'auala e feagai atu ai i le agasala o lo'o tu'itu'i mai pea i le Feagaiga Fou fa'apea tu ma āga fa'atelosia, ae o le tala ile fa'aosoosoga i le toafa – ua tatou fa'alologo i ai i tausaga uma i le aso Sa muamua o le Fagafulu, o se fa'amanatu matuiā tele e tumau pea ma i tatou i fa'aosoosoga. Na alu sa'o Iesu mai le papatisoga i le toafa, ma o i'ina na fa'aosooso ai e le tiapolo mo le fasefulu aso. Manatua i tusitusiga pa'aia o le numera fasefulu o se fa'aailoga e tua mo se taimi umi lava, ma ua aumai ina ia malamalama ai e le o se tauiviga fa'atauva'a lea. O fa'aosoosoga lava ia e tatau ona tatou tomanatu i ai. O le a se mea sili atu le talafeagai, a e fia 'ai, ona mana'o lea i ni mea'ai, ma afai e i ai le mana e mafai ona fa'aliua ma'a ma falaoa, o le a la le fa'afitauli? E ao ona alagatau ona tomanatu i le 'ese'esega i le fafagaina o le motu o tagata i le toafa – i le evagelia a Luka, na maua mea'ai i le vavega. Ona tatou o tagata tatou te fa'anoanoa (ma faitai) i ta'ita'i ma latou e fa'aogā lo latou tulaga ma le paoa e lē mo le lelei o tagata, ae mo latou lava ia ma a latou fa'auō. Na ofoina atu e le tiapolo le paoa ma le mamalu o malō uma o le lalolagi. Ona o tatou o tagata, ua tatou iloa ina lelei le tautua fa'ase'e o le paoa, ma ua tautua na o lē ua u'uina lea paoa i lo le tautua atu ai i isi. A i ai se isi e mana'o e faia se mea e ta'u leleia ai o ia i Ierusalem, o le Malumalu le nofoaga e fai ai, ona o i'ina e potopoto ai le 'au mauululuga ma le 'au tulelei, latou e 'u'uina le pule fa'apea le motu o tagata e potopoto ai. O se va'aiga o oso ifo mai luga o le Malumalu ma fa'asooina o le a laoa'e le tala ave ma le lauiloa fa'apea le ta'uta'ua. Atonu e masani ona tatou manatu ifo a tatou va'ava'ai i se vavega, o le a fo'ia uma ai o tatou fa'afitauli tau le fa'atuatua, ae na masani ona musu Iesu e fa'aoga le mana i lea 'auala. Mo ana fa'amalologa ma vavega, i le fa'ai'uga lava o le fa'atuatua e o'o lava iā latou na mafana le latou mafutaga, na sola. O le fa'aosoosoga o Iesu i le toafa o ni avanoa aogā I le amataga o le Fagafulu e tomanatu ai I le uiga moni o le fa'atuatua, po'o le ā fo'I mo tagata ta'ito'atasi e ta'uta'ua pe leai, po'o le ā le uiga moni o le fa'aosoosoga.

Metitasio Aso Sa 10 Mati 2019

Galala mo le Alofa

I le vaotu'ufua sa feagai ai Keriso ma fa'aosoosoga o lo'o feagai nei ma tagata i aso uma. O le fa'aosoosoga i manatu o mea fa'aletino, le fiamatamuamua, ma le pule malosi. "O ia ma'a te-tele ia ave ma falaoa." E faigofie tele mo i tatou, e fa'ate'ia i le fiaa'ai o le lalolagi, e manatu ai "na'o le falaoa" – o mea fa'aletino - o le fiafia. E faigofie atu auā tatou te iloa afai e lē fafagaina le fia'ai o le a tatou lagonaina le si'ufofoga o Keriso o fetalai mai - "Na ou fia'ai ae e te le'i aumaia se mea ou te 'ai ai".... E lelei le galue mo le falaoa fa'aletino, tatou te fa'afetai ai, ae leaga pe a fa'amalieina ai, e mata'utia pe a gūla ai - e le'o le fia'ai mo le alofa e maua ai le ola, e ola fiafia e aunoa ma se mea e mata'u ai, e leai sona aogā i a'ao fa'avavau.

Ina ua silasila atu Iesu i "atunu'u uma o le lalolagi," na ia va'aia ai o tatou a'ai i aso nei ... lo latou matagofie uma, fa'apea foi ma nu'u palapalā uma, o latou fale fa'afiafia ma faleaiga, o latou falesa ma fale talitane, o latou fale taugatā mananaia fa'apea foi ma fale eleelea, o latou malae ta'alo ma a latou uafu. Na ia va'aia le lavatoto o latou a'ai na pomuina, "O malo o le lalolagi ma o latou vi'iga!" ... O ona tapula'a ua sa'olele atu nai lo se so'o i nei onapo. Ua leiloa le tagata mativa, ua aunoa ma ni faigauo mafana, leai ni tusitusiga, leai ni leitio, leai ni faiga-

FAITAUGA MO LE MASINA MATI 2019

malaga, na'o le tasi lava le gagana. Vavega? I le taimi nei latou te lē fa'atalitonuina se tagata e fia talitonu; ona "galue ai lea o Satani," o lea mea "o se fa'amalamalama ua masani ai po'o se mea fa'afoliga"

E na'o le alofa e mafai ai ona foa'i le ola.

E na'o le alofa o Keriso e mafai ona togiola, fa'amagalo ma fa'amalamalama.

E na'o le alofa o Keriso e mafai ona fafaguina le lalolagi mai le lotosi'igatā e maofa ai.

Na'o le alofa o Keriso e mafai ona fa'anapatiina le lalolagi i se olaga fou.

O le alofa ua tu'uina i le meaalofo-tagata e ia lava. E leai lava ma se isi auala.

Na'o Keriso lava ia. Na ia tu'uina mai o ia lava mo i tatou, ina ia mafai ona tatou

alolofa i le lalolagi i lona alofa ma ia ola ai le lalolagi.

ASO 17 MATI ASO SA LUA OLE FAGAFULU:

Faitauga muamua: Kenese 15: 5 – 12, 17 – 18.

Matua: Ua osi e le Ali'i le feagaiga ma Aperamo.

Salamo 27: 1 (tali), 7 – 8 (tali), 9 (tali), 13 – 14 (tali). Tali: O le Ali'i, o lo'u malamalama ia ma lo'u olataga.

Faitauga lona lua: Filipi 3: 17 – 21; 4: 1. Matua: O le Ali'i o Iesu Keriso na te liua o tatou nei tino fa'atauva'a, ia fa'ataui i lona tino mamalu.

Fuaitupu mo le Evagelia

O le si'ufofoga o le Tamā mai le ao pupula ua fa'apea mai, O lo'u Atali'i pele lenā; ia outou fa'alogo iā te ia.

Evagelia: Luka 9: 28 – 36. Matua: O lo'o tatalo Iesu, a ua liua ona fofoga, ua pa'epa'e ma pupula tele mai ona ofu.

Tofitofiga o le Upu:

O le aso Sa lona lua o le Fagafulu i tausaga ta'itasi e lua tala, o le tala i le Suia o Foliga o Iesu fa'atasi ai ma le mea na tupu mai le tala a Aperamo. O le faitauga o le asō mai le Kenese o le a foliga 'ese ile to'atele, ae o le tala o le Liua o Fofoga o Iesu o se Fa'aaliga – ua fa'aalia e le Atua o le Atua lava i tagata. O se vaega lenei o le feagaiga tele na faia e le Atua ma Aperamo, ma o tagata e masani ona latou malaga fa'atasi ma se folafolaga po'o se feagaiga ma se fa'aailoga, e o'o lava i aso nei. Fai mai nisi o le 'au su'esu'e o le faiga lenā i Sasa'e Ogātonu i aso anamua. O se fa'aailoga o le folafolaga po'o se feagaiga, o se manu po'o ni manu e tipilua ma o nei vaega e lua o le fepasia'i iā i latou e fa'aailoa mai ai 'ia tupu fa'apenei iā te a'u pe 'a 'ou lē tau-sia lenei folafolaga po'o lenei feagaiga'. Sa saunia e Aperamo manu e pei ona poloa'ia, ae ina ua fa'aali mai ai le Atua i se afi, o le Atua lava na uia le va o manu na vaeluaina – o le Atua lava na faia le fa'aailoga o le folafolaga iā Aperamo, ma o le Atua na fa'aleōa upu o le feagaiga. O le tala o le Liua o Fofoga o Iesu ua 'ese lava, ae e tutusa lona le fa'agaioiga. O le Atua na aumaia so'o i le mauga, o le Atua o Lē na fa'aalia mai upu na fa'aleo mai o folafolaga a le Atua. O le Atua e vala'au mai pea iā i tatou i lenā feagaiga.

Metitasio Aso Sa 17 Mati 2019

la tatou faia ni fale'ie se tolu

E tataua ona iloa i totonu o Tusitusiga Paia e ala i le fa'alologo ma le toto'a ma lagonaina aoaoga a le Evagelia ua ta'ua o tapenakulo, po o faleie. Auā afai tatou te iloiloia lelei le aogā o faleie, e moni lava fa'atusatusaga o a'oa'oga a le Evagelia. Auā pe a tolauapi faleie po'o tapenakulo e fitafita, e tolu lava mafua'aga e ala ai ona fai: O le mafua'aga muamua ona o le vevela o le la, e fa'amalū ai. O lona lua, e tete'e atu ai i le osofa'i a le matagi, mo le puipuiaga. Tolu, e malu ai i timuga.

FAITAUGA MO LE MASINA MATI 2019

O nei penefiti uma e tu'uina atu e le Evagelia ia i latou e fa'alogo ma le toto'a, ma fa'asagatau atu i ni sala se tolu. Muamua, o le Evagelia e malū ma puipuia i tatou mai le vevela o le tino, lea e mafua ai ona tata'i le toatele i agasala o le tu'inanau. O nisi ua fa'aosoosoina i le matape'ape'a, a'o nisi o isi agasala - o nei a'oa'oga, e maua ai se malutaga mālū. Lona lua, i lenei lalolagi e tele matagi ma afā ma fa'aosoosoga a temoni, ae le'o i totonu o le faleie - o lona uiga, o le tatalo ma le fa'autautaga. Mo le tatalo ma le fa'autautaga loloto e aloese mai ai i fa'aosoosoga a le tiapolo. Tolu, e tetele timuga ma lologa, ma o le lalolagi lea, na te ofoina atu le tele o avanoa e agasala ai. Ae o le ulufale i le faleie o le Evagelia o le a e maua ai i'inā se vaifofo. E pei ona fai mai Isaia, *Auā, o le vi'iga o le Alii o le a avea ma fale apitaga e fai ma paolo i le ao ona o le vevela, e fai foi ma mea e malu ai, ma mea e ulu ai i le timuga ma le uaga.* (Is. 4: 6)

ASO 24 MATI ASO SA TOLU O LE FAGAFULU:

Faitauga muamua: Esoto 3: 1 – 8, 13 – 15. Matua: E te fai atu i le fanauga a Isaraelu, O A'U O LĒ OLA, o ia na auina mai a'u iā te outou.

Salamo 103: 1 – 2 (tali), 3 – 4 (tali), 6 – 7 (tali), 8, 11 (tali). Tali: E alofa mutimutivale ma alofa fua mai le Ali'i.

Faitauga lona lua: 1 Korinito 10: 1 – 6, 10 – 12. Matua: O mea na o'o iā Mose ma lona nu'u ua tusia e fai ma apoapoa'iga mo i tatou.

Fuuiupu mo le Evagelia:

Ua tala'i atu Iesu, ua fa'apea atu, inā salamō ia outou, auā ua latalata mai le malō o le lagi.

Evagelia: Luka 13: 1 – 9. Matua: Afai tou te lē salamō, e fa'apenā lava ona fano outou uma.

Tofitofiga o le Upu:

O se tasi o vaega o le natura tau fa'amatau o latou ua a'afia i gaioiga fa'aterorisi o le lē fa'ailogaina po'o ai lea. O nei tagata ua fa'amatalaina fa'apea e sesē le nofoaga ma le taimi, pe ana o la e i se isi mea...po'o ua tuai mai? Ua tatou nonofo ma lenā fa'alogo'aga mafatia tele, aiseā? I le evagelia ua talanoa mai ai Iesu i tulaga fa'apenei. Ae lē aumaia se tali i le fesili: aiseā ua a'afia ai i latou ia, ae ua ia aumaia se a'oa'oga taūa tele. O nei tagata atonu o le a 'soloi'esea mai' ae o le i'uga lava na o tagata uma lava vaganā ua 'salamō'. O le salamō e ao ona va'aia, e lē o se mea e tupu fa'atasi i le olaga, ae o se olaga atoa – suia mafaufauga, sui le va'aiaga ma ia o fa'atasi ma ala o le Atua. A olaina ai fa'apenā, ona tatou ola ai lea i le afio ai o le Atua, ma e lē mafai ona soloi'eseina i se manatu mautu. O le fa'ata'oto o lo'o o fa'atasi ma nei fa'amatalaga e taūa fo'i – e i ai le taimi ma e i ai fo'i ma le fofō, e i ai avanoa e mau mai ai fua – ae o avanoa e ao ona tauave nei ma fa'aoga lelei ina ne'i le toe maua i lea tausaga. O se vala'au lea mo i tatou e tatau ona fa'aoga lelei i lenei Fagafulu, ia fa'aoga lenei Fagafulu o se taimi e 'salamō', ma manatu fa'atasi ai ma le Atua, ma ia maua mai ai ni fua o le a tumau pea.

Metitasio Aso Sa 24 Mati 2019

O le Alofa Tunoa o le Salamō

E muamua lava, le tatau ona fa'amamafa atu e leai se mea e sili atu ona patino ma sili atu le loloto nai lo [le Sakalameta o le Fa'aleleiga] lea e na'o le tagata agasala lava e tuto'atasi i luma o le Atua mo ana agasala, salamō ma talitonu. E leai se tasi e mafai ona salamō i lona fale pe talosagaina se fa'amagaloga i lona igoa. E i ai se tulaga tuto'atasi o le tagata agasala i ona sesē, ma o lenei mea e mafai ona va'aia i se fa'atinoga na suitulaga ai Kaino i le agasala "*o lo'o taoto i le faitotoa,*" e pei ona tala manino mai ai le tusi a Kenese, ma le fa'ailoga fa'apitoa i lona muāulu; iā Tavita, na apoapoa'i atu i ai le perofeta o Natanielu; po'o le atali'i fa'amaumau 'oa, ina ua ia iloa le tulaga mauualalo na i ai lona lava tagata e ala i lona alu ese mai lona tamā ma filifili ai e toe foi atu ia te ia.

FAITAUGA MO LE MASINA MATI 2019

E tupu mea uma i le va o le tagata ta'itoatasi ma le Atua. Ae i le taimi lava lea, e lē mafai e se tasi ona fa'afitia le natura masani o lenei sakalameta, i le Ekalesia aoao - o taua, o mafatiaga ma le mamalu i le lagi - e maua i le fesoasoani a le tagata salamō ma toe fa'aulufale o ia i lona loto, aemaise lava le ekalesia aoao lea sa nofosala ma manu'a i lana agasala. I le avea ai ma auauna o le salamō, o le patele lea, e ala i le vituti o lona ofisa paia e tula'i o se molimau ma le sui o lenei natura fa'ale-ekalesia o le sakalameta

Lona lua, e tatau ona fa'amamafaina le fa'ai'uga aupito sili ona taūa o le fa'amagaloga e maua mai i le Sakalameta o le Salamō e aofia ai le toe fa'alelei ma le Atua, lea e fa'atino i totonu o le loto o le atali'i na leiloa ae ua toe maua, so'o se tagata ua salamō. Ae e tatau ona fa'aopoopo i lenei fa'aleleiga lea e toe fa'alelei ai soligā feagaiga na mafua mai i le agasala. O le tagata agasala ua fa'amagaloina ua fa'alelei ma ia lava i lona tulaga loloto, o le mea lea ua ia toe maua ai lona lava fa'asi-nomaga moni.

ASO 31 MATI ASO SA FA O LE FAGAFULU:

Faitauga muamua: Iosua 5: 9 – 12.

Matua: Ua o'o le nu'u o le Atua ile 'ele'ele sa folafolaina, ma ua latou 'a'ai i le paseka.

Salamo: 34: 1 – 2 (tali), 3 – 4 (tali), 5 – 6 (tali). Tali: Inā tofotofo ia outou, ma ia outou iloa e lelei le Ali'i.

Faitauga lona lua: 2 Korinito 5: 17 – 21. Matua: Ua uma ona fa'aleleia e le Atua o i latou iā te ia e ala iā Iesu Keriso.

Fuaiupu mo le Evagelia:

O le a 'ou tula'i ma alu i lo'u Tamā, 'ou te fai atu iā te ia, Lo'u Tamā e, ua 'ou agasala i Lē o i le lagi atoa ma ou luma.

Evagelia : Luka 15: 1- 3, 11 – 32. Matua: O lo'u uso lenā na oti, a ua ola mai.

Tofitofiga ole Upu:

O le tagavai ma le motto o le Tausaga o le Iupelī o le Alofa, ua tu'uina maia le evagelia i luma o mata a le Ekalesia atoa. Atonu o se fesoasoani lea mo tatou e lagona ai le evagelia i se fa'alogoga fou, ma iloa atu ai e ala i se va'aiga e 'ese. O le atali'i 'fa'amaumau 'oa e lē o le autū lea o le tala, o le āta o le 'Tamā' a le atali'i fa'amaumau 'oa o lo'o tumata'i e Luka; o le na toe fa'amaopo mai le atali'i fa'amaumau 'oa. O le moni lea o lo'o tu'itu'i mai pea e Pope Faranisisi ia tatou va'ava'ai i ai. E le na o le fa'apea o le atali'i na amio leaga (aemaise le tu ma aga o taimi o Iesu), e le gata na toe talia ma fa'amaopo mai i lima o lona Tamā, e le fa'apea na faia se 'aiga ma se fiafia ina ua toe fo'i mai, ae o le maualuga o nei mea uma, ae na fa'amatala mai lava i āga a le Tamā: 'Ua tatau ona tatou fiafia ma olioli.' O le agaalofa e le o se mea ua fuaina ma fa'aeteete lona fa'anumeraina. O le natura o le alofa le fa'atua'oia o le Atua ma finauina e leai sona muta'aga i le agalelei ma le alofa o le Atua.

I le tausaga fo'i o le Iupelī o le Aga'alofa sa fa'amalosi'au mai Pope Faranisisi le fa'aogaina o le sakalameta o le Fa'aleleiga – ma o le sini autū lenā o le faitauga lona lua i le asō. Ua toe aumai e Paulo le vaega taūa o le fa'aleleiga na aumai fua e Keriso e leai ma ni tu'utu'uga, ma fa'amanatu mai iā i tatou ona o Kerisiano o la tatou galuega tau'ave o le avea ma amupasa a Keriso ma ta'uta'u i tagata ua latou fa'aleleia – ua faia uma e Keriso mea ua talafegai, ma ua foa'i fua mai e pei o le manai i le toafa po'o fua o le ele'ele i tagata i taimi o Iosua.

Taologologo

FAITAUGA MO LE ASO SA MUAMUA O APERILA – 2019

Aso Sa Lima o le Fagafulu: Faitauga muamua:

Isaia 43: 16 – 21.

Matua: ‘Ou te faia se mea e fa’atoā iloa; auā ‘ou te avatu vai i le vao lafulafuā, e feinu ai lo’u nu’u ua ‘ou fili-filia.

Salamo 126: 1 – 2 (tali), 3 (tali), 4 – 5 (tali), 6 (tali). Tali: Ua faia e le Ali’i mea tetele mo i tatou, ua tatou fifia ai.

Faitauga lona lua: Filipi 3: 8 – 14. Matua: Ua ‘ou fa’alēaogāina mea uma ina ia ‘ou maua Keriso.

FUAIUPU O LE EVAGELIA:

Inā lafoa’i ia o outou solitulafono uma ua outou solitulafono ai, ma ia fai mo outou se loto fou, ma se agaga fou.

Evagelia: Ioane 8: 1 – 11. Matua: O sō outou e leai sana agasala, ia lua’i togi se ma’a iā te ia.

O LE FA’ASOLOGA O MISASA MO MATI 2019

16

1st. Sunday	0.8.30am	Strathmore	Patele Tuli
3 Mati 2019	11.30am	Titahi Bay	Patele Tuli
2nd. Sunday			
10 Mati 2019	11.30am	Naenae	Patele Andrew
3rd. Sunday			
17 Mati 2019	11.00am	Newtown	Patele Tuli
	11.30am	Wainuiomata	Patele Maleko
4th. Sunday			
24 Mati 2019	11.00am	Lower Hutt	Patele Maleko
	11.30am	Stokes Valley	Patele Andrew

KALENA A LE KAPELANISIA MO MATI 2019

MATI ASO 4—Fono Autalavou—Catholic Centre,
6.30pm

Wednesday 6th—Ash Wednesday

MATI ASO 16—Reflection Newtown Aulotu
11am